

Poštovani čitatelji,

Časopis za kulturu i društvena pitanja *Specto*, statutarно utemeljen kao dio Fondacije za podršku naučnoistraživačkom radu i obrazovanju „Spektrum“ u Sarajevu, u javnosti je najavljen koncem prošle godine. Ideja o pokretanju nove publikacije predložena je i usvojena na sjednici Upravnog odbora Fondacije, održanoj u augustu 2023. godine. Polazivši od suštine istraživačkog rada, a to je hipoteza, posmatranje ili propitkivanje političkih, kulturnih procesa i uopće društvenih zbivanja, za zvaničan naziv časopisa simbolično je izabrana latinska riječ *specto* (prev: gledati, promatrati).

Cilj i osnovna misija časopisa je podizanje kvaliteta naučne misli, kako u Bosni i Hercegovini, tako i širem regionalnom kontekstu, njeno oslobađanje od pseudonaučnih i ideoloških zloupotreba, te afirmacija fundamentalnih vrijednosti kulture dijaloga. Razumijevajući izazove vremena u kojem živimo opredijelili smo se, smatrajući to jednim ispravnim putem, za odbranu integriteta povijesti, kulture i nauke argumentiranim i egzaktnim pristupom.

Kao časopis koji tretira širok spektar pitanja iz različitih naučnih disciplina opredijeljeni smo i otvoreni za saradnju sa istraživačima iz Bosne i Hercegovine, država ex - jugoslavenskog prostora i inostranstva koji se u svom radu rukovode spomenutim vrijednostima. U tom smislu, časopis će izlaziti u formi godišnjaka (jednom godišnje), a tematizirat će sljedeće oblasti: historija/povijest, jezik i književnost, sociološka istraživanja, kulturna baština, filozofija, recenzije i prikazi.

Tako konceptualiziran časopis *Specto* u svom internacionalnom redakcijskom kolegiju okupio je respektabilne i međunarodno priznate naučnice/ke: Sonja Biserko (Srbija), dr. Ramiza Smajić (BiH), dr. Vlatka Dugački (Hrvatska), dr. Nadija Rebronja (Srbija), Suada A. Džogović (Kosovo), akademik dr. Šerbo Rastoder (Crna Gora), dr. Dževad Drino (BiH), dr. Emir Demir (BiH) i dr. Abdel Alibegović (BiH). Ovom prilikom upućujem im izraze duboke zahvalnosti na susretljivosti i svesrdnoj podršci.

Pred Vama se, nakon nekoliko mjeseci intenzivnog rada i pripreme, nalazi prvi broj časopisa. U njemu su, što nas osobito raduje, objavljeni radovi velikog broja autora iz Bosne i Hercegovine, regije i Sjedinjenih Američkih Država. Nadamo se da će pojava časopisa *Specto* u naučnom životu donijeti osvježanje i imati prodoran odjek u široj akademskoj zajednici.

mr. Alen Zečević

